

SVAR PÅ SPØRSMÅL TIL AKTUELLE KANDIDATAR TIL NY BISKOP I STAVANGER BISPEDØME

LUDVIG BJERKREIM (54) Prost i Sandnes



1. Kva visjonar har du for Den norske kyrkja framover?

Den norske kyrkja vedtok ny visjon i 2008:

"I Kristus, nær livet - ei vedkjennande, misjonerande, tenande og open folkekyrkje."

Eg vil stolt bera med meg denne visjonen i tenesta mi som prest.

I Kristus - solid forankra i Han som er det fundament me byggjer kyrkja på
- sentrert om Han me trufast skal fylgja og representere
- raust dele ut evangeliet om Guds grensesprengjande nåde og akseptasjon

Nær livet - ei kyrkje som kjenner kvardagen til menneske me møter
- ei raus kyrkje der det er plass til alle dei av oss som slit med livet og har våre små og store kvardagskampar
- ei visjonær kyrkje som formidlar livsmot og håp for livet og framtida
- ei brukskyrkje som folk erfarer som sann, ekte og aktuell

Samstundes skal kyrkja vitna om Jesus lokalt og søke å nå ut til alle folkeslag.

Skal kyrkja vera truverdig, er det viktig at den diakonale dimensjonen er sentral.

Ei sann tru viser seg i liv og gjerning.

Gjennom diakonien skal kyrkja opnast og styrkje banda til dei som har lausare trådar til kyrkje og kristen tru. I den samanheng meiner eg det er viktig å spela på lag med ulike grupper i kyrkje og nærmiljø og gje dei rom i fellesskapet.

Eg drøyer om at Den norske kyrkje skal vera ei aktuell kyrkje for folk flest, ei kyrkje som talar større og sterkare med gjerningane og livet, enn med orda. Samstundes drøyer eg om ei kyrkje der enno fleire kyrkje-aktive kan finne ein plass der trua modnast, utfordrast og gir rom for nådegavebasert teneste. Folkekyrkje og disippelkyrkje hand i hand.

Eg vil gjerne representere ei kyrkje som skapar lengsel, tru, håp, begeistring og mot til å fylgje Jesus og tene Han.

2. Kva for kyrkjeforståing har du?

Den norske kyrkja er ein del av Jesu verdsvide kyrkje. Vi ber med oss evangeliet og Gudsrikeløyndomen. Kristus har kalla menneske med ulike nådegåver, utrustning og erfaring til teneste i denne kyrkja. Saman er vi undervegs som helgenar utan glorie, men med same oppdrag: "Gå difor og gjer alle folkeslag til læresveinar."

Den norske kyrkja har ei stadig utfordring med å ha ein god ballanse mellom embete og råd. Kyrkja må få på plass ei betre organisering enn no med dei to arbeidsgjevarlinene. Uavhengig av organisering, vil eg halda fast på at kyrkja alltid har eit klart oppdrag til å forkynne evangeliet og forvalta sakramenta.

Eg håpar at vi i framtida kan få ei grunnlovsfesta fri og sjølvstendig folkekyrkje med god og forutsigbar økonomi.

3. Kva er kjernen i di forkynning av Guds ord?

I 1. Kor 2,2 seier Paulus *".. eg ville ikkje vita av noko anna hos dykk enn Jesus Kristus og han krossfest."*

Dette er kjernen i det eg er sett til å formidla. Difor eg er oppteken av å teikne eit enkelt og sant bilete av Jesus ut frå dei tekstane eg skal forkynne frå.

Dei tre ledda i truedkjeninga gir oss tre viktige aspekt som skal fram:

1. Gud som ei gong skapte himmel og jord har gitt oss i oppdrag å forvalte skaparverket. I dette ligg utfordringa til å verne om miljøet. Eg søker å gi menneske hjelp til å halda fast på sitt gudgitte verd.
2. Jesus er verdens frelsar. Han synte oss ein guddommeleg raushet, nåde og akseptasjon. Eg ber om å formidla dette så tydeleg at folk kan oppleve kyrkja som tydeleg, raus og nådig på ei gong.
3. Anden arbeidar på ulike vis og kallar menneske til tru. Fleirintelligensteorien utfordrar meg i forkynninga. Difor legg eg vekt på å bruke ord, illustrasjonar, bilete, musikk, dagsaktuelt stoff og andre verkemidlar for å røre menneske med evangeliet. Eg søker å forkynne slik at folk kan oppleve det livsnært og aktuelt i sin livssituasjon. Nådegavebasert teneste er ein viktig del av forkynninga mi.

4. Kva vil du som biskop leggje vekt på i rolla som leiar/åndeleg leiar?

1. Ein biskop skal vera visjonsberar, inspirator og ein som bind saman. Han skal vera med å skape begeistring og stoltheit over kyrkja og det ho representerer.
2. Eg vil vera nær, oppmuntre og ha god dialog med dei eg skal leia. Difor vil eg prioritere møteplassar med medspelarane på dei ulike plan i kyrkja
3. Eg vil aktivt bruke prostane som åndelege og strategiske leiarar
4. Eg vil spele på lag med staben på bispekontoret og bispedømerådet
5. Eg vil knytte til meg andre rådgjevarar på områder der det er aktuelt
6. Eg vil søkje å få leiarvegleiing for eigen del
7. Eg vil prioritere eit godt forhold til kristne organisasjonar og institusjonar
8. I alt dette er det viktig å la trua få næring slik at Gudsordet kan forme tanke, tru, sinn, haldninga og liv. Bøn og tilbeding er sentralt i alt arbeide. Ei levande kyrkje hentar nåde, styrke, mot og inspirasjon hjå Kristus.

5. Fortel kort om dine personlege eigenskapar/åndelege utrustning/nådegåver.

Trus- og livshistoria mi har forma meg til ein trygg, positiv og glad person.

Eg gler meg over livet og ser muligheter og gleder før eg ser dei negative sidene.

Eg ser på meg sjølv som ein raus person som det er lett å samarbeida med.

Eg gler meg over andre og kjenner meg ikkje truga av andre sine kvalitetar. Eg har god helse og stor arbeidskapasitet - er uthaldande og til tider litt sta. I prosessar har eg nokre gonger kort veg frå refleksjon til slutning og handling. Det betyr at eg lett ser muligheter og løysing. I nokre situasjonar er det viktig for meg å bruke litt meir tid i prosessen . Eg er ryddig i administrative oppgåver.

Nådegåvetestar stadfestar at nådegåvene mine m.a. er hyrde/leiar, undervisning og sjelesorg. Eg er glad i menneske og takknemlig for den tenesta eg har som prest i Den norske kyrkja. Eg ber at Herren skal bruke meg som eit reiskap i si hand der eg til ei kvar tid er.

6. Karakteriser deg sjølv som kommunikator.

Eg likar særleg godt å undervise og formidle, og eg får svært ofte positive tilbakemeldingar på det. Ofte opplever eg at forkyninga rører hjarta og ikkje bare tanken. Eg meiner eg er god til å sjå menneske, oppmuntre og inspirere. Eg er ryddig i tanken og har evne til å uttrykke meg punktvis. Eg er takknemlig for at arbeidet har blomstra i dei kyrkjelydane eg har vore prest.

Ein av kyrkjelydane eg arbeida i, hadde vore gjennom ein utfordrande konflikt. Saman med gode medspelarar fekk eg vera med på å lege nokre av såra og bygge fellesskapet til ein levande og velfugerande kyrkjelyd. Eg meiner at eg meistrar relasjonsbygging i fellesskapet. I alle år har eg hatt eit ekstra auga for barn og unge. Dei har fått oppgåver i gudstenestefeiring og fellesskapet elles.

9 år som landsstyreleiar i Søndagsskuleforbundet har gitt meg god erfaring i møteleing og det å prøve å samle trådar til felles vedtak. Me lykkast med å nå ut med visjonen: Jesus til barna.

Som prest har eg lagt vekt på ha eit godt forhold til media. Ved ulykker og andre tragiske dødsfall når medietrykket har vore ekstra stort, har det vore viktig å vera medviten om korleis eg skulle forhalda meg til den jobben media skulle gjera.

Det er avgjerande for ein biskop å byggja gode relasjonar til medspelarane innad i kyrkja og til politikarar, media og andre eg møter i tenesta. Eg vil bruke media aktivt og prøve å nå ut med noko av alt det positive som skjer i bispedømet.

7. Mange teologiske og kyrkjepolitiske saker er på dagsorden i kyrkja. Nemn dei sakene du sjølv synest er mest avgjerande, og kva syn du har i desse sakene.

1. Trusopplæringsatsinga "Størst av alt" er den viktigaste utfordringa for kyrkja framover. Jobb nr 1 er å formidle Jesustrua til barn og unge på ein slik måte at dei vil bere med seg trua med stoltheit og identifisere seg med ei kristen kyrkje.
2. Gudstenestereforma. Viktig å forme gudstenestene våre slik at folk søker dei, blir utfordra til tru, liv og teneste. I dette reformarbeidet må vi ta med det beste av det gamle inn i det nye.
3. At vi flaggar ein klar Jesus-visjon slik at fleire kan frå frimod til å seia stolt "Eg er kristen. Eg trur på Jesus."
4. Stat-kyrkje. Avgjerande å finne ei god ordning med ei grunnlovsfesta fri folkekyrkje med god økonomi frå staten si side.
5. Min teologiske ståstad er forma av truskap mot Bibelen og vedkjenningskriftene. Eg vil identifisere meg med biskop Ernst Baasland sitt teologiske grunnsyn. I ei kyrkje vil vi alltid måtte leve med spenningar og ulike syn på teologiske, kyrkjepolitiske og praktiske spørsmål. Nokre gonger kan det vera smertefullt.

Det ser ut som om kyrkja i homofilisaka har funne fram til standpunkt eg ikkje deler. Likevel må vi kunne arbeida saman i same kyrkje.

8. Gi ein kort refleksjon om kyrkjelydsutvikling i Den norske kyrkja?

Samfunn, tradisjonar og menneske endrar seg stadig. Vi registrer aukande forsamlingsbygging i regi av dei kristne organisasjonane. Folk synes å vera mindre lojale overfor den geografiske kyrkjelyden enn før. Kyrkja har difor eit kall til å leggje til rette for ordningar med ulike modellar for organisering av kyrkjelydar framover, på tvers av gamle strukturar.

Den anglikanske kyrkja har erfaringar vi kan la oss inspirere av. Det er ei stor utfordring for kyrkja å finne ulike ordningar som når menneske i vår tid og knytte dei til ein kyrkjelyd innan ramma av Den norske kyrkja.

9. Del nokre av dine tankar om religionsdialog, økumenikk og misjon.

Norge er påverka av fleire religionar og kulturar. Det er viktig for ei majoritetskyrkje å ha god dialog med representantar for andre religionar, utan å miste stolthet og trygghet i eiga tru. Det ligg ei ekstra forplikting til å ha god dialog med kristne søsken i andre kyrkjesamfunn. Mellomkyrkjeleg råd er ein viktig ressurs på nasjonalt og internasjonalt nivå. På det lokale planet må samtale og fellesskap vera ei prioritert oppgåve. Rogaland har stolte røter for misjonsarbeidet. Misjonsbodet kallar oss til å løfte fram kallet om å nå stadig vidare ut med evangeliet om Jesus.

10. Er det noko anna du vil legge vekt på eller du vil bispedømmerådet skal vere kjent med?

- Dei siste åra har eg gått til leiarvegleiing
- Gjennom engasjementet mitt i Søndagsskulen har eg vore med på å arbeida fram, og erfart ei fornying og vitalisering av søndagsskulararbeidet i Norge. Eg kan m.a. nemna: 364 nye søndagsskular dei fire siste åra, tekstopplegget "Sprell levande" og at gåveinntektene auka med 30% i 2008. I arbeidet i NSSF har eg vore med å vitja alle bispedøme i landet.
- Som prest har eg hatt gleda av å vera med på å byggja to nye kyrkjer, Nysæter -91 og Tananger -02.

Personalia og bakgrunn

Namn	Ludvig Bjerkreim
Adresse	Aubehagen 14 Frå august: Vestregate 17 4046 Hafrsfjord 4307 Sandnes
Fødselsdato	20. mai 1954
Sivil status	Gift med Margunn 2 vaksne barn
Utdanning	<ul style="list-style-type: none">• Teologisk embetseks. MF 1979 II (Studerte ved Misjonsskolen i Stavanger)• Praktikum, MF 1981 I• 10 vekttal Vegleiarutdanning ved Senter for diakoni og veiledning, Bergen, 1993
Hovudkarakter ved teologisk embetseksamen	Laudabilis
Eventuelle faglege publikasjonar	
Arbeidspraksis	1973 - 77 Organist i Bjerkreim 1980 Marineprest, KNM Harald Hårfagre 1981 - 86 Kallskap i Evje 1986 - 99 Res.kap. i Stord 1999 - 08 Kapellan/Sokneprest i Sola 2008 - Prost i Sandnes
Tillitsverv og engasjement	1991-97 Medlem av landsstyret i Norsk Søndagsskoleforbund (NSSF), Frå 1994-97 nestleiar 1997- 00 Varamedlem i landsstyret i NSSF 2000-09 Leiar i landsstyret i NSSF Tillitsvervet i NSSF inneber at eg var/er med i Organisasjonenes fellesråd (OF) og representantskapet i IKO og NLA. NSSF sin representant i representantskapet i Bibelselskapet i to treårs-periodar. <ul style="list-style-type: none">• I ein toårsperiode var eg med i stiftsstyret for Presteforeininga i Stavanger. 2004 -09 Mentor for trusopplæringsprosjektet "Størst av alt" i Time prestegjeld.
Anna	